

Na osnovu člana 13. stav 2. Zakona o principima lokalne samouprave u Federaciji Bosne i Hercegovine („Službene novine Federacije BiH”, broj: 49/06 i 51/09), člana 13. stav 1. tačka c) i stav 3. Zakona o pripadnosti javnih prihoda u Federaciji Bosne i Hercegovine („Službene novine Federacije BiH”, broj: 22/2006, 43/2008, 74/2008 - odluka US, 22/2009, 35/2014, 94/2015 i 17/2022), člana 3. Zakona o komunalnim taksama („Službeni list SRBiH”, broj: 21/77, 35/88 i 26/89 i „Službeni glasnik BiH”, broj: 12/24 – Odluka Ustavnog suda Bosne i Hercegovine), a u vezi sa članom 1. stav (3) Zakona o poreznoj upravi Federacije Bosne i Hercegovine („Službene novine FBiH”, broj: 33/02, 28/04, 57/09, 40/10, 29/11 - odluka US, 27/12, 7/13, 71/14, 91/15 i 44/22) i člana 25., a u vezi s članom 124. Statuta Grada Tuzle („Službeni glasnik Grada Tuzle”, broj: 6/21 i 4/25), Gradsko vijeće Tuzla, na sjednici održanoj dana \_\_\_\_\_, donosi

**O D L U K U**  
**o komunalnim taksama**  
**(NACRT)**

**I – OPĆE ODREDBE**

**Član 1.**  
**(Predmet Odluke)**

Ovom Odlukom propisuju se komunalne takse na području grada Tuzle (u daljem tekstu: takse), vrste taksi, obveznici plaćanja taksi, razrez i naplata taksi, visina taksi po tarifnom broju, način i rokovi plaćanja taksi, kriteriji za utvrđivanje takse, oslobađanje od plaćanja takse, nadzor nad provođenjem ove Odluke, kao i druga pitanja koja se odnose na naplatu taksi.

**Član 2.**  
**(Definicije pojmova)**

Definicije pojmova u smislu ove Odluke su:

- a) Pod priređivanjem zabavnih igara u ugostiteljskim objektima i drugim prostorima podrazumijevaju se igre na računarima, igraćim konzolama, simulatorima, automatima za video igre, fliperima, bilijarima i drugim sličnim automatima koji se stavljaju u pogon pomoću kovanog novca, žetona ili uz naplatu, a u kojima igrač ne može ostvariti dobitak u novcu, stvarima ili pravima;
- b) Pod korištenjem aparata za posebne igre na sreću i sl. podrazumijevaju se mehanički, elektronski ili slični uređaji čije korištenje od jednog ili više korisnika u konačnici donosi mogućnost ostvarenja određenog dobitka;
- c) Pod korištenjem poslovnog prostora u kojem se priređuju klasične igre na sreću i posebne igre na sreću, podrazumijeva se svaki prostor u kojem se priređuju klasične igre na sreću i/ili posebne igre na sreću;
- d) Držanje i izvođenje muzike uživo u ugostiteljskim objektima i baštama ugostiteljskih objekata podrazumijeva povremeno ili svakodnevno izvođenje muzičkog programa (muzike uživo) uz pružanje ugostiteljskih usluga;
- e) Priređivanje komercijalnih koncerata podrazumijeva organizovanje i priređivanje koncerata na otvorenom i u zatvorenom prostoru uz naplatu karata;

- f) Postavljanje i držanje uređaja za isplatu i naplatu gotovine (bankomata) podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;
- g) Postavljanje i držanje svih drugih uređaja koji putem automatske obrade podataka naplaćuju usluge korisnicima gotovinom, karticama za naplatu ili posredstvom telekom operatera (kafemati, parkomati, cvjetomati i sl.) podrazumijeva postavljanje, navedenih uređaja koji automatskom obradom podataka obračunavaju i naplaćuju razne vrste usluga bez ličnog posredovanja konzumenta sa pružaocem usluga, koji može biti registrovan kao fizičko ili pravno lice.

### **Član 3. (Vrste taksi)**

Takse se naplaćuju za:

- a) Priređivanje zabavnih igara;
- b) Korištenje aparata za posebne igre na sreću i sl.;
- c) Poslovni prostor u kojem se priređuju klasične igre na sreću i/ili posebne igre na sreću;
- d) Držanje i izvođenje muzike uživo u ugostiteljskim objektima i baštama ugostiteljskih objekata;
- e) Priređivanje komercijalnih koncerata;
- f) Postavljanje i držanje uređaja za isplatu i naplatu gotovine (bankomata);
- g) Postavljanje i držanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatora (kafemati, parkomati, cvjetomati i sl.).

### **Član 4. (Obveznik plaćanja takse)**

- (1) Obveznici plaćanja takse su pravna i fizička lica koja su korisnici prava na postavljanje, držanje i korištenje uređaja, predmeta i dr. ili prava na korištenje prostora na području grada, a za čije je postavljanje, držanje i korištenje propisano plaćanje takse ovom Odlukom.
- (2) Ako je za istu taksu prijavljeno više obveznika, njihova obaveza je solidarna.

## **II – RAZREZ I NAPLATA TAKSE**

### **Član 5. (Nastanak obaveze plaćanja takse)**

- (1) Taksena obaveza nastaje danom početka korištenja prava, predmeta ili otpočinjanja vršenja usluga, za čije je korištenje propisano plaćanje takse i traje sve dok traje korištenje prava, predmeta ili vršenja usluga, ako to ovom Odlukom nije drugačije propisano.
- (2) Komunalna taksa predstavlja prihod Grada Tuzle i uplaćuje se na depozitni račun Grada Tuzle.

**Član 6.**  
**(Razrez, utvrđivanje obaveze plaćanja i naplata takse)**

- (1) Razrez, utvrđivanje obaveze plaćanja, naplatu i prinudnu naplatu utvrđenih obaveza po osnovu komunalne takse iz člana 3. tačka a) i b) vrši Kantonalni porezni ured – Poreska ispostava Tuzla u skladu sa odredbama Zakona o poreznoj upravi Federacije Bosne i Hercegovine, odredbama ove Odluke i drugim podzakonskim aktima.
- (2) Utvrđivanje visine obaveza i naplatu komunalnih taksi iz člana 3. tačka c), d) i e) vrši nadležna gradska služba za oblast ekonomskog razvoja i poduzetništva.
- (3) Utvrđivanje visine obaveza i naplatu komunalnih taksi iz člana 3. tačka f) i g) vrši gradska služba nadležna za oblast komunalnih poslova i izgradnje.

**Član 7.**  
**(Načini i rokovi za podnošenje prijave takse)**

- (1) Prijavu za razrez komunalne takse iz člana 3. alineja a) i b) ove Odluke obveznik podnosi Poreznoj upravi - Porezna ispostava Tuzla, na obrascu broj 1 i 2 koji je sastavni dio ove Odluke najkasnije do 28. februara tekuće godine, prema stanju na dan 1. januar iste godine za koju se razrez vrši, odnosno u roku od sedam dana, ako je obveznik otpočeo sa obavljanjem djelatnosti u toku poslovne godine.
- (2) Promjene nastale poslije 1. januara tekuće godine, odnosno u toku godine, obveznik je dužan prijaviti Poreznoj ispostavi, najkasnije narednog dana od dana nastanka promjene.
- (3) Prijavu za utvrđivanje obaveze za plaćanje takse, određene članom 3. tačka c). d). i e), obveznik plaćanja takse podnosi gradskoj službi nadležnoj za oblast ekonomskog razvoja i poduzetništva na obrascu broj 3., 4. i 5., koji su sastavni dio ove Odluke.
- (4) Prijavu za utvrđivanje obaveze za plaćanje takse, određene članom 3. tačka f). i g)., obveznik plaćanja takse podnosi gradskoj službi nadležnoj za oblast komunalnih poslova i izgradnju na obrascu broj 6. i 7., koji su sastavni dio ove Odluke.
- (5) Prijavu za utvrđivanje obaveze plaćanja komunalne takse iz člana 3. tačka c)., f). i g). ove Odluke, obveznik plaćanja takse podnosi najkasnije do 28.02. za tekuću godinu, odnosno u roku od sedam dana od dana otpočinjanja djelatnosti, ako je obveznik otpočeo sa obavljanjem djelatnosti u toku poslovne godine.
- (6) Prijavu za uvrđivanje obaveze za plaćanje takse iz člana 3. tačka d). i e). obveznik plaćanja takse podnosi najkasnije pet dana prije nastanka taksene obaveze.

**Član 8.**  
**(Obaveza prijave takse)**

Obveznik komunalne takse iz člana 4. ove Odluke dužan je podnijeti prijavu za komunalnu taksu utvrđenu članom 3. ove Odluke u rokovima propisanim članom 7. ove Odluke.

**Član 9.**  
**(Sadržaj taksene prijave)**

- (1) Obrazac broj 1 i 2 za Prijavu razreza komunalne takse za priređivanje zabavnih igara i korištenje aparata za posebne igre na sreću i sl., sadrži najmanje slijedeće podatke: Identifikacioni broj poreznog obveznika, identifikacioni broj PDV ili broj lične karte, stari porezni broj poreznog obveznika, naziv obveznika, adresa, transakcijski račun, šifra djelatnosti, adresa prostora ili lokacije gdje nastaje taksena obaveza, vrsta objekta, broj objekata i iznos komunalne takse.
- (2) Obrazac broj 3, 4 i 5 za Prijavu za utvrđivanje obaveze komunane takse, sadrži najmanje slijedeće podatke: naziv obveznika, sjedište i adresa taksenog obveznika, adresa prostora ili lokacije gdje nastaje taksena obaveza, brojeve transakcijskih računa otvorenih kod banaka, broj poslovnih jedinica, identifikacioni broj poreskog obveznika ili broj lične karte, šifra djelatnosti, tarifni broj i iznos komunalne takse.
- (3) Obrazac broj 6 i 7 za Prijavu za utvrđivanje obaveze komunane takse, sadrži najmanje slijedeće podatke: naziv obveznika, sjedište i adresa taksenog obveznika, adresa prostora ili lokacije gdje nastaje taksena obaveza, brojeve transakcijskih računa otvorenih kod banaka, broj poslovnih jedinica, identifikacioni broj poreskog obveznika ili broj lične karte, šifra djelatnosti, tarifni broj i iznos komunalne takse.

**Član 10.**  
**(Postupak plaćanja takse)**

- (1) Taksene prijave moraju biti potpune i podnesene u roku, propisanom ovom Odlukom.
- (2) Obveznik plaćanja takse iz člana 3. tačka a) i b) ove Odluke, plaća taksu u godišnjem iznosu unaprijed za tekuću godinu, najkasnije do 28.2. za tekuću godinu, odnosno u roku 15 dana od dana izdavanja naloga za plaćanje od strane Kantonalnog poreznog ureda-Porezne ispostave Tuzla, u skladu sa članom 41. Zakona o poreznoj upravi Federacije BiH.
- (3) Obveznik plaćanja takse iz člana 3. tačka c), f) i g) Ove odluke plaća taksu u godišnjem iznosu unaprijed najkasnije do 28.2. za tekuću godinu, odnosno u roku od 15 dana od dana donošenja rješenja nadležne službe iz člana 7. stav 3 i 4 ove Odluke.
- (4) Ukoliko je obveznik takse započeo sa obavljanjem djelatnosti u toku poslovne godine, taksu će uplatiti unaprijed obračunatu za broj mjeseci koji je preostao do isteka poslovne godine.
- (5) Ukoliko je obveznik takse prestao sa obavljanjem poslovne djelatnosti u toku poslovne godine, ima pravo na povrat dijela uplaćene takse, obračunate za broj mjeseci koji je preostao do isteka poslovne godine od dana prestanka poslovne djelatnosti.
- (6) Na izdati nalog Porezne ispostave za plaćanje, obveznik ili njegov zastupnik, ima pravo prigovora Poreznoj ispostavi Tuzla u skladu sa odredbama Zakona o poreznoj upravi Federacije BiH.
- (7) Obveznik plaćanja takse iz člana 3. tačke c), d), e), f) i g) ove Odluke, plaća taksu u rokovima utvrđenim rješenjem nadležnog organa.
- (8) Jedan primjerak rješenja iz prethodnog stava ovog člana nadležni organ je dužan dostaviti gradskoj službi nadležnoj za poslove budžeta i finansija.

### **Član 11. (Rješenje)**

- (1) Obavezu plaćanja takse, na osnovu podnesenih prijava, rješenjem utvrđuju:
  - a) Porezna uprava - ispostava Tuzla za taksu iz člana 3. tačka a) i b);
  - b) Služba za ekonomski razvoj, poduzetništvo i poljoprivredu za taksu iz člana 3. tačka c), d) i e);
  - c) Služba za komunalne poslove, izgradnju i poslove mjesnih zajednica za taksu iz člana 3. tačka f) i g).
- (2) Ako obveznik takse iz stava (1) ovog člana nije podnio prijavu u rokovima utvrđenim članovima 7. i 10., Porezna uprava ima pravo da po isteku roka od 15 dana od dana obaveze podnošenja prijave u ime taksenog obveznika podnese prijavu za plaćanje takse iz člana 3. tačka a) i b) ove Odluke, a nadležne službe će po službenoj dužnosti donijeti rješenje za taksu iz člana 3. tačka c), d), e), f) i g) ove Odluke.

### **Član 12. (Evidencija)**

- (1) Porezna uprava i nadležne gradske službe za upravu kontinuirano prikupljaju i evidentiraju podatke i promjene od značaja za razrez i naplatu takse.
- (2) Nadležne gradske službe za upravu i inspekcijski organi će Poreznoj upravi dostavljati podatke, dokumentaciju i informacije od značaja za razrez i naplatu takse iz člana 3. tačka a) i b) ove Odluke, do kojih dođu u obavljanju poslova iz svoje nadležnosti.

### **Član 13. (Obračun taksi)**

Takse iz člana 3. ove Odluke obračunavaju se i plaćaju u visini kako je to utvrđeno Tarifom komunalnih taksi (u daljem tekstu: Tarifa), koja je sastavni dio ove Odluke.

### **Član 14. (Neblagovremeno plaćanje takse)**

- (1) Za neblagovremeno plaćanje takse propisane ovom Odlukom, plaća se zakonska zatezna kamata u skladu sa propisima Federacije Bosne i Hercegovine, koji regulišu visinu zatezne kamatne stope.
- (2) Odredba iz prethodnog stava ovog člana, naznačit će se kao obaveza za obveznika plaćanja komunalne takse u rješenju iz člana 11. ove Odluke.

**Član 15.**  
**(Povrat takse)**

- (1) Obveznik koji je platilo taksu, koju po odredbama ove Odluke nije bio dužan da plati, kao i obveznik koji je taksu platio u iznosu većem od propisanog, ima pravo na povrat iznosa koji nije bio dužan da plati.
- (2) Zahtjev za povrat sredstava se podnosi Poreznoj upravi odnosno gradskoj službi koja je nadležna za utvrđivanje takse.
- (3) Porezna uprava, odnosno nadležna gradska služba, je dužna da u roku od 30 dana odluči o zahtjevu.

**III – KRITERIJI ZA UTVRĐIVANJE VISINE TAKSE**

**Član 16.**  
**(Kriterij za utvrđivanje visine takse)**

Visina takse utvrđuje se prema sljedećim kriterijima, i to:

- a) površina prostora po m<sup>2</sup> koja se koristi,
- b) broj komada predmeta koji se koriste,
- c) zone u kojima se koriste predmeti, prostori ili pružaju usluge

**Član 17.**  
**(Zone za utvrđivanje takse)**

Područje grada Tuzle u pogledu utvrđivanja visine takse dijeli se na četiri zone navedene u Aneksu I, koji je sastavni dio ove Odluke.

**IV – OSLOBAĐANJE OD PLAĆANJA TAKSE**

**Član 18.**  
**(Oslobađanje od plaćanja takse)**

- (1) Od plaćanja takse oslobođeni su:
  - a) Organi Bosne i Hercegovine, Federacije Bosne i Hercegovine, Tuzlanskog kantona i Grada Tuzle,
  - b) Međunarodne organizacije i diplomatsko-konzularna predstavništva,
  - c) Ustanove iz oblasti obrazovanja, nauke, kulture i prirodne baštine, sporta, socijalne zaštite, humanitarne i dobrotvorne organizacije,
  - d) Vjerske zajednice,
  - e) Organizacije ratnih vojnih invalida, porodica šehida-poginulih boraca i demobilisanih boraca,
  - f) Obrtnici koji obavljaju djelatnost utvrđenu Uredbom o zaštiti tradicionalnih i starih obrta, kao i obrtnici koji obavljaju djelatnost „kućna radinost“, u smislu Zakona o obrtu i srodnim djelatnostima,
  - g) pravna lica koja u svojstvu suorganizatora sa Gradom Tuzlom organizuju manifestacije na području grada Tuzle.

(2) Zahtjev za oslobađanje od plaćanja takse podnosi se organu nadležnom za razrez i utvrđivanje takse, koji odlučuje o istom.

## **V – NADZOR**

### **Član 19. (Nadzor nad provođenjem Odluke)**

- (1) Nadzor nad provođenjem ove Odluke u pogledu prijave, obračuna i plaćanja takse, kao i prinudnu naplatu u slučaju neplaćanja takse iz člana 3. tačka a) i b) ove Odluke vrši nadležni Kantonalni porezni ured – Poreska ispostava Tuzla.
- (2) Nadzor nad provođenjem ove Odluke u pogledu prijave, obračuna i plaćanja takse, kao i prinudnu naplatu putem Gradskog pravobranilaštva u slučaju neplaćanja takse iz člana 3. tačka c), d) i e) vrši gradska služba nadležna za oblast ekonomskog razvoja i poduzetništva, dok za takse utvrđene članom 3. tačke f) i g) navedene aktivnosti vrši gradska služba nadležna za oblast komunalnih poslova i izgradnju.

### **Član 20. (Inspekcijski nadzor)**

Inspekcijski nadzor nad provođenjem ove Odluke vrši Služba za inspekcijske poslove-nadležni Inspektorat komunalne inspekcije.

## **VI – KAZNE NE ODREDBE**

### **Član 21. (Kazne za prekršaje)**

- (1) Novčanom kaznom u iznosu od 1.000,00 KM do 2.000,00 KM kazniće se za prekršaj pravno lice, ako u roku propisanim članom 7. stav (5) i (6) ove Odluke, ne podnese prijavu za komunalnu taksu utvrđenu članom 3. iste Odluke.
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom u iznosu od 500,00 KM do 1.000,00 KM.
- (3) Za prekršaj iz stava (1) ovog člana kaznit će se i fizičko lice, novčanom kaznom u iznosu od 300,00 KM - 800,00 KM.
- (4) Za prekršaj iz stava (1) ovog člana kaznit će se i fizičko lice, koje obavlja samostalnu poslovnu djelatnost – obrt, novčanom kaznom u iznosu od 300,00 KM do 800,00 KM.

## **VII - ZAVRŠNE ODREDBE**

### **Član 22. (Stupanje na snagu Odluke)**

Odluka stupa na snagu narednog dana od dana objavljivanja u „Službenom glasniku Grada Tuzla”, a primjenjivati će se od 1.1.2026. godine.

## ANEKS I – ZONE PODRUČJA GRADA TUZLE

### DIO A - 0 ZONA

| R/b | Naziv ulice                      |
|-----|----------------------------------|
| 1.  | Turalibegova                     |
| 2.  | Dr. Milana Jovanovića            |
| 3.  | Klosterska                       |
| 4.  | Kulina Bana                      |
| 5.  | Musala                           |
| 6.  | Haima Pinte                      |
| 7.  | Kazan mahala                     |
| 8.  | Franje Ledera                    |
| 9.  | Đorđa Mihajlovića                |
| 10. | Mihajla i Živka Crnogorčevića    |
| 11. | Pozorišna                        |
| 12. | Hadžibakirbega Tuzlića           |
| 13. | Jevrejska                        |
| 14. | Trg Kapija                       |
| 15. | Patriotske lige                  |
| 16. | Trg Stara tržnica                |
| 17. | Solni trg                        |
| 18. | 25. maja                         |
| 19. | Kazandžijska                     |
| 20. | Zlatarska                        |
| 21. | Trgovačka                        |
| 22. | Tuzlanskih odreda                |
| 23. | Malkoćeva                        |
| 24. | Barok                            |
| 25. | Trg Žrtava genocida u Srebrenici |
| 26. | Hadži Hasanage Pašića            |
| 27. | Trg Slobode                      |
| 28. | Tabašnice                        |
| 29. | Franjevačka (od br.2 do 24A)     |
| 30. | Gradska                          |
| 31. | Atik mahala                      |
| 32. | Stari grad                       |
| 33. | Šetalište Slana Banja            |
| 34. | Srpska varoš                     |
| 35. | Džindić mahala                   |
| 36. | Pavkuša                          |
| 37. | Ludviga Kube                     |

### DIO B - I ZONA

| R/b | Naziv ulice                    |
|-----|--------------------------------|
| 1.  | Mirze Delibašića               |
| 2.  | Bulevar 2. korpusa Armije RBiH |
| 3.  | 1. inženjerijske brigade       |
| 4.  | Maršala Tita                   |
| 5.  | Petra Kočića                   |
| 6.  | Kralja Tvrtka prvog            |
| 7.  | 2. tuzlanske brigade           |
| 8.  | 2. oktobra                     |

|     |                              |
|-----|------------------------------|
| 9.  | Dragiše Trifkovića           |
| 10. | Muse Čazima Čatića           |
| 11. | Aleja Alije Izetbegovića     |
| 12. | ZAVNOBiH-a                   |
| 13. | Dr. Tihomila Markovića       |
| 14. | Alije Isakovića              |
| 15. | Put Gradina                  |
| 16. | Dr. Rose Hadživuković        |
| 17. | Džemala Bijedića             |
| 18. | Radojke Lakić                |
| 19. | Vladimira Nazora             |
| 20. | Radeta Peleša                |
| 21. | Mehmedalije Maka Dizdara     |
| 22. | 15. maja                     |
| 23. | Ismeta Mujezinovića          |
| 24. | Trg Evropske unije           |
| 25. | Hendek                       |
| 26. | Fra Grge Martića             |
| 27. | Franjevačka (od br.26 do 46) |
| 28. | Pazar                        |
| 29. | Ratimira Deletisa            |
| 30. | Univerzitetska               |
| 31. | Džafer mahala                |
| 32. | Muhameda Hevajja Uskufija    |
| 33. | 6. bosanske brigade          |
| 34. | Kristijana Krekovića         |
| 35. | Safvet-Bega Bašagića         |
| 36. | Albina i Franje Herljevića   |
| 37. | Kraljice Katarine            |
| 38. | Slatina                      |
| 39. | Mirze Hadžimehmedovića       |

## DIO C - II ZONA

| R/b | Naziv ulice             |
|-----|-------------------------|
| 1.  | Meše Selimovića         |
| 2.  | Pašage Mandžića         |
| 3.  | Tušanj                  |
| 4.  | Dragodol                |
| 5.  | Džemala Mandžića        |
| 6.  | Rudarska                |
| 7.  | Batva                   |
| 8.  | Jure Keroševića         |
| 9.  | Ive Andrića             |
| 10. | Pašabunar               |
| 11. | Behram-begova           |
| 12. | Ivana Markovića Irca    |
| 13. | 18. hrvatske brigade    |
| 14. | Sulejmana Aličića Sulje |
| 15. | Damira Hadžibeganovića  |
| 16. | Save Kovačevića         |
| 17. | Admira Dedića           |
| 18. | Urfeta Vejzagića        |
| 19. | Drage Karamana          |
| 20. | Krečanska               |
| 21. | Mije Keroševića Guje    |
| 22. | Bosne srebrene          |

|     |                                      |
|-----|--------------------------------------|
| 23. | Envera Šiljka                        |
| 24. | Muftije Muhamed-efendije Kurta       |
| 25. | Mustafe Hukića                       |
| 26. | Obala Zmaja od Bosne                 |
| 27. | Jalska                               |
| 28. | Goli Brijeg                          |
| 29. | Reis Mehmeda Efendije Azabagića      |
| 30. | Đure Đakovića                        |
| 31. | 1. tuzlanske brigade                 |
| 32. | Armije Republike Bosne i Hercegovine |
| 33. | Miroslava Krleža                     |
| 34. | Novo Naselje                         |
| 35. | Slavka Mičića                        |
| 36. | Strajka Mitrovića                    |
| 37. | Šabana Zahirovića                    |
| 38. | Branilaca Bosne i Hercegovine        |
| 39. | Goste Lazarevića                     |
| 40. | Hasana Brkića                        |
| 41. | Luke                                 |
| 42. | Slavinovići                          |
| 43. | Žarka Vukovića Pucara                |
| 44. | Ciglana                              |
| 45. | Izeta Sarajlića                      |

**DIO D - III ZONA** - Ostalo područje grada Tuzla

## **ANEKS II – TARIFA KOMUNALNIH TAKSI**

**DIO A-TARIFA BROJ 1.** (Priređivanje zabavnih igara)

| <b>Vrsta zabavnih igara</b>                                                                                                                          | <b>Nulta zona</b> | <b>I zona</b> | <b>II zona</b> | <b>III zona</b> |
|------------------------------------------------------------------------------------------------------------------------------------------------------|-------------------|---------------|----------------|-----------------|
| Igre na računarima, igraćim konzolama, simulatorima, automatima za video igre, fliperima, bilijarima i drugim sličnim automatima (KM/komad/godišnje) | 120,00            | 100,00        | 60,00          | 40,00           |

**DIO B- TARIFA BROJ 2.** (Korištenje aparata za posebne igre na sreću i sl.)

| <b>Vrsta posebnih igara na sreću</b>                                                                                   | <b>Nulta zona</b> | <b>I zona</b> | <b>II zona</b> | <b>III zona</b> |
|------------------------------------------------------------------------------------------------------------------------|-------------------|---------------|----------------|-----------------|
| Priređivanje igara na sreću putem elektronskih ili mehaničkih mašina i automata (slot mašine) (KM/po aparatu/godišnje) | 5.000,00          | 4.000,00      | 3.000,00       | 2.000,00        |

**DIO C-TARIFA BROJ 3.** (Poslovni prostor u kojem se priređuju klasične igre na sreću i/ili posebne igre na sreću)

| Poslovni prostor u kojem se priređuju klasične igre na sreću i/ili posebne igre na sreću (KM/godišnje) | Nulta zona | I zona    | II zona   | III zona  |
|--------------------------------------------------------------------------------------------------------|------------|-----------|-----------|-----------|
| Iznos takse                                                                                            | 20.000,00  | 18.000,00 | 16.000,00 | 15.000,00 |

**DIO D-TARIFA BROJ 4.** (Držanje i izvođenje muzike uživo u ugostiteljskim objektima i baštama ugostiteljskih objekata)

| Zona       | Taksa po jednom danu | Mjesečni paušal | Tromjesečni paušal |
|------------|----------------------|-----------------|--------------------|
| Nulta zona | 40 KM                | 180 KM          | 400 KM             |
| Zona I     | 30 KM                | 160 KM          | 350 KM             |
| Zona II    | 25 KM                | 140 KM          | 300 KM             |
| Zona III   | 20 KM                | 130 KM          | 250 KM             |

**DIO E-TARIFA BROJ 5.** (Priređivanje komercijalnih koncerata)

| Vrsta prostora | Zatvoreni prostor | Otvoreni prostor |
|----------------|-------------------|------------------|
| Visina takse   | 1,5 KM po m2      | 0,5 KM po m2     |

NAPOMENA: kod otvorenog prostora taksa se mjeri i obračunava po m2 bine i ograđenog otvorenog prostora

**DIO F-TARIFA BROJ 6.** (Postavljanje i držanje uređaja za isplatu i naplatu gotovine - bankomata)

| Vrsta takse                                                                                                           | Iznos    |
|-----------------------------------------------------------------------------------------------------------------------|----------|
| Za postavljanje i držanje uređaja za isplatu i naplatu gotovine (bankomata) plaća se taksa godišnje po jednom uređaju | 1.000 KM |

**DIO G-TARIFA BROJ 7.** (Postavljanje i držanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatora -kafemati, parkomati, cvjetomati i sl.)

| Vrsta takse                                                                                                                                                                                                                                    | Iznos         |
|------------------------------------------------------------------------------------------------------------------------------------------------------------------------------------------------------------------------------------------------|---------------|
| Za postavljanje i držanje uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati, cvjetomati i sl.) plaća se taksa godišnje po jednom uređaju ) | <b>300 KM</b> |

**GRAD TUZLA**

**Gradsko vijeće**

**Broj:**

Tuzla, \_\_\_\_\_ 2025. godine

**PREDSJEDAVAJUĆA**

\_\_\_\_\_  
Ana Pejić, BA prava

## Obrazloženje

### I Pravni osnov

Pravni osnov za donošenje Odluke sadržan je u odredbama člana 13. stav 2. Zakona o principima lokalne samouprave u Federaciji Bosne i Hercegovine („Službene novine Federacije BiH”, broj: 49/06 i 51/09), člana 13. stav 1. tačka c) i stav 3. Zakona o pripadnosti javnih prihoda u Federaciji Bosne i Hercegovine („Službene novine Federacije BiH”, broj: 22/2006, 43/2008, 74/2008 - odluka US, 22/2009, 35/2014, 94/2015 i 17/2022), člana 3. Zakona o komunalnim taksama („Službeni list SRBiH”, broj: 21/77, 35/88 i 26/89 i „Službeni glasnik BiH”, broj: 12/24 – Odluka Ustavnog suda Bosne i Hercegovine), a u vezi sa članom 1. stav (3) Zakona o poreznoj upravi Federacije Bosne i Hercegovine („Službene novine FBiH”, broj: 33/02, 28/04, 57/09, 40/10, 29/11 - odluka US, 27/12, 7/13, 71/14, 91/15 i 44/22) i člana 25., a u vezi s članom 124. Statuta Grada Tuzle („Službeni glasnik Grada Tuzle”, broj: 6/21 i 4/25), kojim je propisano da općinska/gradska vijeća donose propise kojima se utvrđuje visina komunalnih taksi iz oblasti, za koju su nadležni općina/grad kao jedinica lokalne uprave i samouprave, kao i visina drugih naknada, novčanih kazni i taksi u njihovoj nadležnosti.

### II Razlozi za donošenje

Donošenje ove Odluke rezultat je potrebe da se na adekvatan i detaljan način uredi oblast komunalnih taksi na području grada Tuzle.

Odlučujući o zahtjevu Kantonalnog suda u Tuzli za ocjenu ustavnosti člana 3. stav 1. tačka 4. i stav 2, te člana 12. Zakona o komunalnim taksama („Službeni list SRBiH” br. 21/77, 35/88 i 26/89), Ustavni sud Bosne i Hercegovine, donio je 18.1.2024. godine, Odluku broj: U -11/23), kojom se utvrđuje da član 3. stav 1. tačka 4. i stav 2. i član 12. Zakona o komunalnim taksama („Službeni list SRBiH” br. 21/77, 35/88 i 26/89) nisu u skladu sa članom II/3.k) Ustava Bosne i Hercegovine i članom 1. Protokola broj 1 uz Evropsku konvenciju za zaštitu ljudskih prava i osnovnih sloboda. Pomenuta odluka, broj i datum gornji se odnosila na takse na isticanje firmi, koje je Poreska uprava Federacije BiH naplaćivala u skladu sa članom 1. stav (3) Zakona o poreznoj upravi Federacije Bosne i Hercegovine („Službene novine FBiH”, broj: 33/02, 28/04, 57/09, 40/10, 29/11 - odluka US, 27/12, 7/13, 71/14, 91/15 i 44/22), koji je ostao i dalje na snazi i koji ničim nije osporen pred Ustavnim sudom.

Nakon donošenja citirane odluke Ustavnog suda Bosne i Hercegovine, Gradsko vijeće Tuzla je na svojoj sjednici održanoj dana 19.12.2024. godine donijelo Odluku o prestanku važenja Odluke o komunalnim taksama („Službeni glasnik Općine Tuzla”, broj 9/77, 5/82, 9/85, 9/87, 8/88, 4/89, 8/89, 4/90, 7/90 6/91, 8/91, 11/91 i 3/93), kojom je prestala primjena odredbi o naplati i drugih komunalnih taksi, a koje su navedene u dispozitivu tj. u članu 3. ove Odluke.

S obzirom na navedeno i zaključke Kolegija Gradonačelnika Tuzle broj: 02/04-A-18748-2024 od 6.12.2024. godine, kojim je određeno, da se ima formirati radna grupa za izradu nove odluke o komunalnim taksama, pristupilo se izradi iste. Kod izrade ove Odluke,

korištena su iskustva i odluke drugih općina i gradova, koje su na adekvatan način uredile ovu oblast

U prilog navedenom važno je istaći i da je Služba za internu reviziju Grada Tuzla u proteklom periodu izvršila reviziju prihoda od komunalnih taksi, te je aktom Gradonačelnika, broj: 16/11-A-06993-2021 od 23.08.2021. godine usvojen je Plan aktivnosti/pregled preporuka izvršene revizije prihoda od komunalnih taksi, u kojem se između ostalog navodi da je potrebno izvršiti detaljnu analizu i usklađivanje tada važećeg internog akta kojim je bila regulisana predmetna oblast na način da se osigura tačan i sveobuhvatan pregled svih komunalnih taksi za adekvatno upravljanje ovom vrstom prihoda, te utvrditi jasna nadležnost za upravljanje prihodima od komunalnih taksi, kao i potreba prilagođavanja forme obrasca za prijavu komunalne takse koji se objavljuje na zvaničnoj web stranici Porezne uprave F BiH u skladu sa izmjenama internog akta. Slijedom navedenog formirano je radno tijelo koje je pri izvršavanju planiranih aktivnosti na realizaciji prethodno prezentovanih preporuka detaljnom analizom internog akta kojim je regulisana oblast komunalnih taksi ocijenilo da je usljed utvrđenog obima potrebnih izmjena internog akta svrsishodnije sačiniti nacrt novog akta kojim će se oblast komunalnih taksi na području grada Tuzla urediti na adekvatan način.

### **III Obrazloženje pojedinih odredaba**

#### **I – OPĆE ODREDBE**

(član 1. – 4.)

Predstavlja uvodni dio Odluke u kojim je utvrđen predmet Odluke, te se definišu predmet odluke, daju definicije pojmova, određuju vrste komunalnih taksi i obveznici plaćanja istih.

#### **II – RAZREZ I NAPLATA TAKSE**

(član 5. – 14.)

U ovom dijelu Odluke regulisano je nastanak obaveze plaćanja takse, nadležnost za razrez, utvrđivanje obaveze plaćanja i naplata komunalne takse, način prijave takse, obaveza prijave i sadržaj taksene prijave, rokove za podnošenje prijave i plaćanje taksi. Obračun taksi, postupanje u slučaju neblagovremenog plaćanja takse i povrat takse.

#### **III – KRITERIJI ZA UTVRĐIVANJE VISINE TAKSE**

(član 15. – 16.)

Ovim poglavljem Odluke definisani su kriteriji za utvrđivanje visine takse, kao i zone za utvrđivanje komunalne takse.

#### **IV - OSLOBAĐANJE OD PLAĆANJA TAKSE**

(član 17.)

Članom 17. Odluke taksativno se navodi ko se oslobađa od obaveze plaćanja komunalne takse, te utvrđuje način realizacije oslobođanja od plaćanja komunalne takse.

## V – NADZOR (Član 18. i 19.)

Ovim poglavljen uređena je nadležnost nad provođenjem ove Odluke u pogledu prijave, obračuna i plaćanja takse, kao i inspekcijski nadzor u dijelu kaznenih odredbi.

## VI – KAZNENE ODREDBE (Član 20.)

Članom 20. propisuju prekršajna odgovornost obveznika za postupanja u suprotnosti sa odredbama ove Odluke, te visina novčanih kazni za pojedinačne taksativno navedene prekršaje obveznika plaćanja komunalne takse.

## VII – ZAVRŠNE ODREDBE (Član 21.)

U prilogu Odluke sadržan je Aneks I – ZONE PODRUČJA GRADA TUZLE, Aneks II- Tarifa komunalnih taksi, kao i Obrasci za prijavu komunalne takse.

Zone su utvrđene na slijedeći način:

- Zona 0 – uže područje grada Tuzle, obuhvata područje od zgrade MUP-a do Skvera, sa svim poprečnim ulicama sa lijeve i desne strane, te kompleks Slane banje;
- I zona obuhvata područje grada Tuzle od zgrade MUP-a do Brčanske Malte (uključujući i Brčansku Maltu), te naselja Stupine i Sjenjak i područje od skvera do naselja Slatina, uključujući i naselje Slatina;
- II zona - šire područje grada Tuzle i naselja gradskog karaktera, koje obuhvata područje od naselja Slatina do Irca, uključujući i naselje Irac sa poprečnim ulicama, naselja Tušanj, Batva i Moluše te naselje Slavinovići,

III zona – ostalo područje grada Tuzle.

Sastavni dio ove Odluke su i obrasci za podnošenje prijave komunalne takse, broj 1,2,3,4,5,6 i 7. Sastavni dio ove Odluke je i uporedni pregled visine taksi po općinama i gradovima u Federaciji Bosne i Hercegovine (Općina Centar, Općina Novo Sarajevo, Grad Bihać, Grad Gračanica, Općina Stari Grad itd.)

## **IV Finansijska sredstva**

Za provođenje ove Odluke nije potrebno obezbjeđenje dodatnih finansijskih sredstava u Budžetu Grada Tuzle.

## **Dodatak obrazloženju Odluke o komunalnim taksama**

**U vezi sa prijedlozima vijećnice u Gradskom vijeću Tuzla, gospođe Dragane Berberović-Gagro, dajemo slijedeće izjašnjenje:**

Dati prijedlozi su inovativni, te ukazuju na mogući prostor plaćanja raznih vrsta taksi i naknada, ali na žalost zbog složenog ustavnog uređenja Bosne i Hercegovine, podjele nadležnosti između različitih nivoa vlasti u Bosni i Hercegovini, kao i položaja gradova i općina, kao jedinica lokalne samouprave neke takse/naknade nije moguće uvesti odlukom gradskog, odnosno općinskog vijeća, jer se iste mogu uvesti samo zakonom. Osim toga, neke takse su tretirane kao naknade kroz druge gradske propise, dok je dio prijedloga naravno prihvatljiv. U daljem tekstu, dat ćemo naše izjašnjenje u vezi sa svakim pojedinačnim prijedlogom.

### **1.Moguće nove / korisne komunalne takse (primjeri iz drugih gradova BiH, regije i EU)**

#### **1.1.Takse za zagađivače zraka**

-Primjena u Sarajevu i Zenici (npr. takse za firme koje emituju više CO<sub>2</sub>, sumpora ili prašine).

Cilj: da oni koji najviše zagađuju više i plaćaju, a sredstva da idu u fond za čist zrak i energijsku efikasnost. (imamo veliki problem cinkarne u samom gradu, roštilji restorana ,pekara,čevabdžinica pod prozorima u zgradama itd..)

#### **Izjašnjenje:**

Prema odredbama Ustava Federacije Bosne i Hercegovine, ekološka politika je u podijeljenoj nadležnosti između Federacije Bosne i Hercegovine i kantona (član III.2.a. Ustava Federacije Bosne i Hercegovine), što podrazumijeva propisivanje taksi i naknada za različite vrste zagađivača. Naime, navedene takse i naknade se mogu propisivati isključivo zakonom, a ne odlukama gradskih, odnosno općinskih vijeća. U Federaciji Bosne i Hercegovine, postoje zakoni i drugi propisi, koji regulišu navedenu oblast, uključujući i naknade ekološke prirode, kao što su: Zakon o zaštiti okoliša Federacije Bosne i Hercegovine ("Službene novine Federacije Bosne i Hercegovine", broj 15/21), Zakon o Fondu za zaštitu okoliša Federacije Bosne i Hercegovine ("Službene novine Federacije Bosne i Hercegovine", broj 33/03), Zakon o zaštiti zraka ("Službene novine Federacije Bosne i Hercegovine", broj 33/03, 41/10 i 110/12). Navedene naknade, plaćaju zagađivači zraka tj. pravna i fizička lica čije djelovanje direktno ili indirektno uzrokuje onečišćavanje okoliša u smislu Zakona o zaštiti okoliša, drugih okolinskih zakona i/ili međunarodnih propisa. Dakle, ne postoji mogućnost da gradovi i općine uvedu pomenutu vrstu taksi, zato što nisu nadležni i zato što bi se radilo o dvostrukom oporezivanju.

#### **1.2 Takse za neuređene i zapuštene objekte / zemljišta**

- Postoji u Zagrebu i Ljubljani.
- Vlasnici zapuštenih objekata ili parcela plaćaju dodatnu taksu dok ih ne stave u funkciju.
- Cilj: poticaj da se centar grada i naselja ne zapuštaju.

#### **Izjašnjenje:**

Pravo na imovinu je jedno od osnovih ustavom zagarantiranih prava (član II.2.k Ustava Federacije Bosne i Hercegovine). Osim Ustavom, pravo na imovinu je definirano članom 1. Protokola broj 1 uz Evropsku konvenciju za zaštitu ljudskih prava, koji glasi:

„1. Svako fizičko ili pravno lice ima pravo na neometano uživanje svoje imovine. Niko ne može biti lišen svoje imovine, osim u javnom interesu i to pod uslovima predviđenim zakonom i opštim načelima međunarodnog prava.

2. Prethodne odredbe, međutim, ni na koji način ne utiču na pravo države da primenjuje zakone koje smatra potrebnima da bi regulisala korišćenje imovine u skladu sa opštim

interesima ili da bi obezbedila naplatu poreza ili drugih dažbina ili kazni.”

Evropska konvencija za zaštitu ljudskih prava prema članu II.2 Ustava Bosne i Hercegovine ima prioritet nad domaćim zakonodavstvom, te ako je domaći zakon u suprotnosti sa Evropskom konvencijom za zaštitu ljudskih prava ista se ima direktno primijeniti.

Dakle, samo se ZAKONOM može ograničiti pravo na imovinu u skladu sa opštim interesima, te u tom smislu uvesti naplata poreza, dažbina i drugih taksi. Po našem mišljenju ne bi se taksa za neuređene objekte mogla uvesti odlukama gradskog vijeća, a da predhodno takva mogućnost NIJE predviđena zakonom. Pretpostavljamo, da gradovi Zagreb i Ljubljana, imaju osnov u zakonima Republike Hrvatske i Republike Slovenije za propisivanje navedenih taksi.

### **1.3. Takse za priređivače igara na sreću (kladionice, kockarnice, slot aparati)**

- U nekim općinama već postoji;
- Cilj: dodatni prihod budžetu, a rasterećenje privrede i građana (jer se pogoduje društveno štetnijoj djelatnosti).

#### **Izjašnjenje:**

Na određeni način prihvaćeno i ugrađeno u nacrt Odluke o komunalnim taksama, pri čemu treba uzeti u obzir i presudu Ustavnog suda Federacije Bosne i Hercegovine broj: U-61/23 od 18.02.2025. godine (“Službene novine Federacije Bosne i Hercegovine”, broj 22/25, kojim je utvrđeno da “ član 2. tačka 3. i član 23. Tarifni broj 3. Zakona o komunalnim taksama ("Službene novine Kantona Sarajevo", br.: 14/06-Prečišćeni tekst, 34/07, 2/08, 31/12, 36/12 i 28/18), u vrijeme važenja nisu bili u skladu sa Ustavom Federacije Bosne i Hercegovine”.

### **1.4. Naknada za jednokratnu plastiku i ambalažu**

- Primjena u nekim gradovima EU (npr. Barcelona).
- Trgovci i ugostitelji plaćaju malu naknadu ako koriste plastične čaše/kese, a sredstva idu za reciklažu. (razraditi ovaj model-svi koriste plastiku od imbis, restorana, trgovina, supermarketa.) Tu bi bio jedan od značajnijih prihoda u budžet .

#### **Izjašnjenje:**

Prema odredbama Ustava Federacije Bosne i Hercegovine, ekološka politika je u podijeljenoj nadležnosti između Federacije Bosne i Hercegovine i kantona (član III.2.a. Ustava Federacije Bosne i Hercegovine), što podrazumijeva propisivanje taksi i naknada za različite vrste otpada. Ovo pitanje je regulirano Zakonom o upravljanju otpadom Federacije Bosne i Hercegovine (“Službene novine Federacije Bosne i Hercegovine “(Službene novine Federacije Bosne i Hercegovine”, broj 33/03, 71/09 i 92/17) i Uredbom o kriterijima za obračun i način plaćanja naknada za proizvode koji nakon upotrebe postaju ambalažni i električni i elektronski otpad (“Službene novine Federacije Bosne i Hercegovine”, broj 104/22). Dakle, ne postoji mogućnost da gradovi i općine uvedu pomenutu vrstu taksi, zato što nisu nadležni i zato što bi se radilo o dvostrukom oporezivanju.

### **1.5. Komunalna naknada za vozila koja zauzimaju javnu površinu dugoročno**

-Npr. za dostavna vozila koja stalno parkiraju na pješačkim zonama.

-Cilj: smanjiti blokiranje saobraćaja i potaknuti na korištenje dozvoljenih parkinga.

#### **Izjašnjenje:**

Pitanje vozila, koja zauzimaju javnu površinu tretirana su Odlukom o komunalnom redu („Službeni glasnik Općine Tuzla“, broj: 4/10, 9/10, 1/11, 3/11 i „Službeni glasnik Grada Tuzla“, broj: 11/15, 9/16, 1/18, 5/18, 1/19, 9/19, 1/20 i 11/22), i Odlukom o visini naknada po Odluci o komunalnom redu („Službeni glasnik Općine Tuzla“, broj: 9/12 i „Službeni glasnik Grada Tuzla“, broj: 6/15, 7/15, 6/16, 12/16, 2/17, 8/18 i 5/19).

### **1.6. Takse za mobilne operatere / antene**

1.5. U Zagrebu i Beogradu postoje posebne naknade za bazne stanice na javnim površinama. (ove naknade na godišnjem nivou nisu male)

1.6. Cilj: prihod u budžet, bez direktnog udara na građane.

#### **Izjašnjenje:**

Pitanje postavljanja pokretnih naprava, uključujući i baznih stanica mobilnih operatera na javnim površinama regulisana su Odlukom o komunalnom redu („Službeni glasnik Općine Tuzla“, broj: 4/10, 9/10, 1/11, 3/11 i „Službeni glasnik Grada Tuzla“, broj: 11/15, 9/16, 1/18, 5/18, 1/19, 9/19, 1/20 i 11/22) i Odlukom o visini naknada po Odluci o komunalnom redu („Službeni glasnik Općine Tuzla“, broj: 9/12 i „Službeni glasnik Grada Tuzla“, broj: 6/15, 7/15, 6/16, 12/16, 2/17, 8/18 i 5/19).

**1.7. Taksa na reklame tendi, banera na privatnim objektima, lokalima, restoranima, zgradama, automobilima, taksi autima, autobusima** -tu se ipak koristi javni prostor. (koliko su opravdane takse da se brendovi mogu reklamirati u poslovnim objektima to je upitno- cigarete, alkohol itd...)

Često smo svjedoci da neki brendovi koriste objekte u privatnom vlasništvu, zgrade, kao i lokale za postavljanje svojih banera, velikih tendi sa ogromnim porukama, logo znacima, stvarajući time nelojalnu konkurenciju iznajmljivačima reklamnih panoa koji uredno plaćaju zakup, a i stvaraju neurednost i ruglo na ulicama. Svaka reklama koja je vidljiva preko posrednika privatnog, pravnog lica a koje nije iz djelatnosti oglašavanja bi trebala potraživati naknadu. Bilo bi preporučljivo odrediti dimenzije koje bi bile besplatne na primjer 50x20 pisano 30x30 logo, a sve ostale uočljivije sa ulica da plaćaju naknadu u zavisnosti od veličin (voditi računa kako formulirati i obezbijediti da na tendi od 10m ne bude logo 30x30 na boji platna loga ili poruke pa da tu ne bude propusta).

#### **Izjašnjenje:**

Pitanje postavljanja pokretnih naprava, uključujući i reklama, tendi, banera na javnim površinama regulisana su Odlukom o komunalnom redu („Službeni glasnik Općine Tuzla“, broj: 4/10, 9/10, 1/11, 3/11 i „Službeni glasnik Grada Tuzla“, broj: 11/15, 9/16, 1/18, 5/18, 1/19, 9/19, 1/20 i 11/22), i Odlukom o visini naknada po Odluci o komunalnom redu („Službeni glasnik Općine Tuzla“, broj: 9/12 i „Službeni glasnik Grada Tuzla“, broj: 6/15, 7/15, 6/16, 12/16, 2/17, 8/18 i 5/19).

Kada su u pitanju objekti u privatnom vlasništvu, ne postoji zakonski osnov za propisivanje navedenih taksi od strane Gradskog vijeća. Navedeno se eventualno može regulisati, kroz zakonske odredbe, koje uređuju porez na imovinu.

### **2. Takse koje se mogu ukinuti ili smanjiti**

(olakšanje građanima i privredi)

#### **2.1 Ukinuta taksa za isticanje firme**

- Tuzla je već ukinula krajem 2024. 🖐
- Dobro je pratiti da se ne vrati jer je nepotrebno opterećivala mala preduzeća.

#### **2.2. Smanjenje naknade za korištenje javnih površina (bašte kafića zimi)**

- U Sarajevu i Mostaru smanjene zimske tarife da ugostitelji lakše opstanu.
- Tuzla bi mogla još dodatno rasteretiti zimske mjesece.

#### **Izjašnjenje:**

Pitanje postavljanja pokretnih naprava na javnim površinama (stolovi, stolice u ljetnim i zimskim baštama) regulisana su Odlukom o komunalnom redu („Službeni glasnik Općine Tuzla“, broj: 4/10, 9/10, 1/11, 3/11 i „Službeni glasnik Grada Tuzla“, broj: 11/15, 9/16, 1/18, 5/18, 1/19, 9/19, 1/20 i 11/22), i Odlukom o visini naknada po Odluci o komunalnom redu („Službeni glasnik

Općine Tuzla“, broj: 9/12 i „Službeni glasnik Grada Tuzla“, broj: 6/15, 7/15, 6/16, 12/16, 2/17, 8/18 i 5/19). Stoga se ovo pitanje, treba regulirati navedenim odlukama.

### **2.3.Smanjenje taksi za plakatanje i reklamne panoje za kulturne manifestacije,**

ali uvesti taksu za svaku živu svirku kako u komercijalnim objektima tako i na privatnim posjedima

-Zahtjev -taksa za datum xxx- odobrenje od 20h-00h,ili 00:1h

-U nekim gradovima kulturne humanitarne manifestacije imaju **popust ili oslobođanje**.

-Prednost: podrška kulturi i humanitarnom radu.

#### **Izjašnjenje:**

Prihvaćeno. Uvodi se taksa za muziku uživo u ugostiteljskim objektima i baštama ugostiteljskih objekata, kao i taksa na održavanje komercijalnih koncerata. Navedeno podrazumijeva, da se ne plaća taksa za humanitarne manifestacije.

Pitanje postavljanja reklamnih panoa , uključujući i panoje za kulturne manifestacije regulisana su Odlukom o komunalnom redu („Službeni glasnik Općine Tuzla“, broj: 4/10, 9/10, 1/11, 3/11 i „Službeni glasnik Grada Tuzla“, broj: 11/15, 9/16, 1/18, 5/18, 1/19, 9/19, 1/20 i 11/22), i Odlukom o visini naknada po Odluci o komunalnom redu („Službeni glasnik Općine Tuzla“, broj: 9/12 i „Službeni glasnik Grada Tuzla“, broj: 6/15, 7/15, 6/16, 12/16, 2/17, 8/18 i 5/19).

### **2.4.Smanjenje naknade za muziku u ugostiteljskim objektima**

-Trenutno 200 KM mjesečno u Tuzli.

-Moglo bi se smanjiti ili zamijeniti proporcionalno broju sjedećih mjesta / veličini lokala.Ovo treba važiti samo za lokale

#### **Izjašnjenje:**

Sugestija prihvaćena i prijedlog se nalazi u tekstu Odluke o komunalnim taksamama.

**2.5.Taksa za manifestacije** -kroz službu za kulturu provjeriti zakonitost poslovanja na teritoriji FBiH i donijeti rješenje uz plaćanje takse za svaki pojedinačni događaj.(rasteretiti organizatore od plaćanja taksi za živu svirku,koja treba biti obaveza objekta-,vlasnika,prostora , kluba,svečanog salona ,kafića,restorana)

-Taksa za zauzimanje javne površine kod organizacije raznih manifestacija -I komercijalnih i nekomercijalnih.Taksa se uređuje po 1m2. (primjer Sarajevo)

#### **Izjašnjenje:**

Sugestija prihvaćena i prijedlog se nalazi u tekstu Odluke o komunalnim taksamama.

### **2.6.Privremeno oslobođanje od pojedinih taksi za start-up firme i mlade poduzetnike**

-Primjeri: Beograd, Novi Sad.

-Npr. prva godina rada oslobođena pojedinih taksi.

#### **Izjašnjenje:**

Razmatrajući ovaj prijedlog bitno je istaći da Grad Tuzla, putem Službe za ekonomski razvoj, poduzetništvo i poljoprivredu, svake godine podržava samostalne poduzetničke djelatnosti i privredna društva, registrovane na području grada Tuzle, putem Javnog poziva za učešće u programu raspodjele sredstava iz Budžeta Grada Tuzle namijenjenih za podršku privatnim preduzećima i poduzetnicima, (Projekat „Siguran start“).

U okviru ovog Javnog poziva otvorene su dvije linije podrške:

1. Podrška za samostalne poduzetničke djelatnosti u osnovnom zanimanju i privredna društva na području grada Tuzle, novoregistrovane firme u tekućoj godini.

2. Podrška za samostalne poduzetničke djelatnosti u osnovnom zanimanju i privredna društva registrovane u predhodnoj godini području grada Tuzle.

Putem ovog Javnog poziva, u obje gore navedene linije podrške, predviđeni su sljedeći oblici podrške :

- a) refundiranje/finansiranje troškova obaveznih doprinosa za PiO i zdravstveno osiguranje i osiguranje od nezaposlenosti za vlasnika registrovanih samostalnih poduzetničkih djelatnosti
- b) sufinansiranje nabavke neophodne opreme i sredstava za rad registrovanog subjekta, za samostalne poduzetničke djelatnosti i privredna društva
- c) sufinansiranje troškova zakupa poslovnog prostora u kojem subjekt obavlja registrovanu djelatnost, za samostalne poduzetničke djelatnosti i privredna društva
- d) sufinansiranje/finansiranje troškova poslovnih usluga (računovodstvenih, pravnih, usluga marketinga, informatičkih, finansijskih i sl.), za samostalne poduzetničke djelatnosti i privredna društva

Također, u postupku registracije samostalne poduzetničke djelatnosti primjenjuje se pogodnost plaćanja takse za izdavanje odobrenja za rad samostalnim obrtnicima, u iznosu umanjenom za 50% u odnosu na visinu takse utvrđenom Odlukom o administrativnim taksama Grada Tuzla i Tarifom općinskih administrativnih taksi .

Dodatno, Grad pruža podršku novoosnovanim privrednim subjektima i putem mogućnosti korištenja poslovnog prostora pod povoljnim uslovima za "start up" kompanije u inkubacionim centrima (BIT Centar i RPC centar "Lipnica"), kao i druge vidove podrške samostalnim poduzetničkim djelatnostima u realizaciji promotivnih aktivnosti, a u saradnji sa Udruženjem obrtnika Grada Tuzla.

#### **Obradivači**

- 1.Radna grupa za pripremu prijedloga Odluke o komunalnim taksama Grada Tuzle**
- 2.Služba za komunalne poslove, izgradnju i poslove mjesnih zajednica**
- 3.Služba za ekonomski razvoj, poduzetništvo i poljoprivredu**
- 4.Služba za budžet i finansije**